

मार्निंग डोगरी न्यूज़ बुलेटिन, समें. **09-20** Hrs

<><><><><><>

## Headlines

1. जम्मू कश्मीर विधानसभा चुनावों के त्रिए गेड़ तैहत् 7एं जिलें च फैली दिएं 40 विधानसभा सीटें पर मतदान शुरू। 39 लक्ख 18 ज्हार योग्य मतदाताएं लेई 5 ज्हार 60 मतदान केन्द्र बनाए गेदे न।
2. मुख् चुनावों आयुक्त राजीव कुमार ते प्रधानमंत्री नरेन्द्र मोदी होरें लोकें अग्गे अपील कीती ऐ जे लोकतंत्र दे इस पर्व गी कामयाब बनाने लेई अग्गे औन।
3. सरकारै जम्मू संभाग दे सोए आले जोन हेठ पौंदे सब्बने स्कूलें दा समे बदलियै सयाले आले समें दी घोषणा कीती।
4. नलिन प्रभात होरें जम्मू कश्मीर पुलसै दे नमें प्रमुख दे तौरा पर अपना कम्मकाज सांभी लैता ऐ।

<><><><><><>

## JK 3<sup>rd</sup> Phase Voting

जम्मू कश्मीर च असैबली चुनावों दे त्रिए ते खीरले गेड़ लेई इसलै मतदान चला'रदा ऐ। 7एं जिलें च फैले दे 40एं चुनावों हलकें च अमन-शांति आले ढंगै सिर वोट पाने लेई सुरक्षा दे व्यापक ते पुख्ता प्रबंध कीते गेदे न। मतदान अज्ज बडलै 7 बजे शुरू होआ जेहड़ा संजा 6 बजे तगर चलोग। 5 ज्हार 60 मतदान केन्द्रें च 20 ज्हार मतदान अमला तैनात कीता गेदा ऐ। अज्ज जेहड़े 7एं जिले च मतदान होआ'रदा ऐ, ओ न कश्मीर प्रांतै दे बारामुला, कुपवाड़ा ते बांडीपोरा ते जम्मू प्रांतै दे जम्मू, उधमपुर, सांबा ते कठुआ। 39 लक्ख शा बी मते मतदाता अज्ज 415एं मेदवारें दी किस्मत दा फैसला करगंन। कश्मीर दे मुख् मेदवारें च उपमुख्मंत्री मुज्जफर हुसैन बेग, वशारत बुखारी, सज्जाद गनी लोन ते नासिर असलम वानी शामिल न। जम्मू प्रांतै च मुख् मेदवारें च देवेन्द्र सिंह राणा, चौधरी लाल सिंह ते रमण भल्ला शामिल न।

चुनावों गी लेइयै लोकें च बड़ा मता उत्साह दिखने गी लब्भा'रदी ऐ ते मतदान शुरू होने कोला पैहले गै लोक लम्मी लम्मी रीगें च मतदान केन्द्र पर पुज्जी गेदे हे।

## Postal Ballot

जम्मू प्रांतै दे चार जिले कटुआख सांबा, उधमपुर ते जम्मू च जित्थें अज्ज विधानसभा चुनां दे त्रीए गेड़ तैह्त वोट पोआए जा करदे न, उत्थें गै उधमपुर जिले च डकै राएं वोट पाने दी बवस्था तैह्त चनैनी विधानसभा हल्के च सब्बने शा मता 98.72 प्रतिशत मतदान दर्ज कीता गेआ ऐ। डकै राएं वोट पाने दी प्रक्रिया गी रिटर्निंग अफसर रामपाल हुंदी दिक्ख-रिक्ख च जिला चुनां अफसर सलोनी राय हुंदे पूरे पराते मार्गदर्शन हेठ तोड़ चाढ़ेआ गेआ। जिला चुनां अफसर होरें 61 नंबरचनैनी हल्के च डकै राएं वोट पाने सरबंधी रिटर्निंग अफसर ते जिले च होरने सब्बने रिटर्निंग अफसरें दी निष्ठा ते तनदेही दी सराहना कीती जेह्दी बदौलत डकै राएं बारे वोट पाने दा कम्म पूरी चाल्ली बवस्था आले ढंगै सिर तोड़ चढ़ी सकेआ।

## CEC Appeal

जम्मू कश्मीर च त्रीए गेड़ दे असैंबली चुनाएं गी दिक्खदे होई मुख चुनां आयुक्त राजीव कुमार होरें मतदाताएं गी अपील कीती ऐ जे ओह बधी-चढ़ियै मतदान करन। कुमार होरें आखेआ जे जम्मू कश्मीर च मतदान दी प्रतिशत, मेदवारें दी गिनतरी ते प्रचार सब्बने च गै बाद्धा दर्ज कीता गेआ ऐ। उनें आखेआ जे पैहले ते दुए गेड़ दे मतदान दरान बहिश्कार जां परतियै मतदान दा कोई मामला सामने नेई आया। उनें आखेआ जे अजें तगर होए दे मतदान दा प्रतिशत ऐतिहासक रेआ ऐ ते अस समाज दे हर तबके गी अपील करने आं जे ओह अज्ज बधी-चढ़ियै मतदान करन।

## Modi Message

प्रधानमंत्री नरेन्द्र मोदी होरें मतदाताएं गी अपील कीती ऐ जे ओह जम्मू-कश्मीर च अज्ज त्रीये ते अखीरले गेड़ दे असैंबली चुनाएं च वोट पाने दे अपने हक्कै दा इस्तेमाल पक्क गै करन। सोशल मीडिय मंच एक्स पर जारी इक स्नेह च मोदी होरें आखेआ ऐ जे अज्ज जम्मू-कश्मीर च त्रीये ते अखीरले गेड़ तैह्त वोट पुआए जा करदे न। उनें लोके गी गुजारिश कीती ऐ जे ओह अग्गे औन ते लोकतंत्र दे इस उत्सव दी कामयाबी लेई पक्क गै मतदान करन। उनें विश्वास जाहर कीता जे नौजवानें ते पैहली बारी वोट पाने आहले मतदाताएं दे कन्नो-कन्नी महिला शक्ति बी अज्ज बधी-चढ़ियै मतदान करोग।



<><><><><><><><>

## School Timing

जम्मू दे स्कूली शिक्षा निदेशालय नै जम्मू संभाग दे स्याले आहले ज़ोन दे स्कूलें दे समें च तब्दीली दा हुक्म जारी कीता ऐ। हुक्मै मुजब जम्मू संभाग दे सोए आहले ज़ोन च सब्बनें सरकारी ते मान्यता हासल निजी स्कूलें दा समें अक्तूबर म्हीनें दरान बड्डलै 9 बजे शा दपैहरी 3 बजे तगर होग ते पही 1 नवम्बर कोला एह समें बड्डलै 10 बजे शा दपैहरी मगरा 4 बजे तगर होई जाहग। मुंसिपल हद्द दे अंदर औने आहले स्कूलें दा समें बड्डलै 9 बजे शा दपैहरी 3 बजे तगर दा होग।

<><><><><><><><>

## New DGP

वरिष्ठ आईपीएस अधिकारी नलिन प्रभात होरें आर.आर.स्वैन हुंदे सेवानिवृत होने मगरा जम्मू कश्मीर पुलस दे महानिदेशक दा औहदा सांभे लाैता ऐ। पुलस हैडक्वार्टर च लाए गेदे इक सादे जनेह समारोह दरान प्रभात होरें डीजीपी दा औहदा सांभेआ। प्रभात होर आंध्रप्रदेश काडर दे 1992 बैच दे आईपीएस अधिकारी न। उनेंगी आंतकवाद—रोधी बक्ख—बक्ख अभियानें दी अगुवाई दा खरा मता तर्जुबा ऐ ते उनेंगी 3 पुलस वीरता पदक ते 1 पराक्रम पदक कन्नै नवाजेआ जाई चुके दा ऐ। ओह कारवाइएं सरबंधी सीगें दे आईजी ते अतिरिक्त महानिदेशक दे तौर पर बी बपनियां सेवां देई चुके दे न। मेद ऐ जे उंदी नियुक्ति कन्नै खित्ते च रमानदारी ते स्थिरता बश्कार रखने च योगदान मिलोग।

<><><><><><><><>

## CS Sampark

मुख्य सचिव अटल डुल्लु होरें केन्द्र शासित प्रदेश च राष्ट्री जरनैली सिडकें दे निर्माण बारै अजें तगर हासल होई दी प्रगति दी समीक्षा लेई एन.एच.ए.आई., एन.एच.आई.डी.सी.एल., बीकन ते प्रोजेक्ट संपर्क कन्नै इक तपसीली बैठक लाई। मुख्य सचिव होरें कम्म तोढ चाढ़ने आहली एजेंसिएं पर जोर पाया जे ओह अपनी कारकरदगी च होर सुधार आहने ते मित्थे गेदे लक्ष्यें गी तय समें दे अंदर—अंदर सबूरा करोआन।

<><><><><><><><>

## DEO Udhampur

उधमपुर दिएं जिला चुनां अफसर सलोनी राय होरें विधानसभा चुनां 2024 दे सिलसिले च लाई गेदी ड्यूटी गी नजरअंदाज करने आले 2 सरकारी मलाजमें खलाफ तुरत कारवाई करदे होई उनेंगी मुअत्तल करी दित्ता ऐ।

जेडईओ दफतर डुडु च हेड्ड असिस्टेंट कुलभूषण कौर जिसी इनें आम चुनाएं लेई प्रिजाइडिंग अफसर नियुक्त कीता गेदा हा, उसी चुनां सिखलाई आले कार्यक्रमें च शामिल नेई होने पर एह कारवाई कीती गई ऐ। इनें सिखलाई सैशनें च शामिल होना चुनां अमले लेई लाजमी होंदा ऐ। इक दुए मामले च चनैनी जोन हेठ पौंदे सरकारी प्राइमरी स्कूल कोठी दे इक टीचर जसवंत सिंह जिसी 61-40 मतदान केन्द्र नरसू लेई बीएलओ नियुक्त कीता गेदा हा, उसी बी अपनी चुनां सरबंधी ड्यूटी नेई देने पर मुअत्तल कीता गेआ ऐ।

<><><><><><>